

## **Tribina ano Delčevo „E palpalunipa tare tikneberšengere prandina kori romani populacia”**

Ko 18-to juni 2008 b. ano Delčevo sine ikerdi i tribina ki tema „E palpalunipa tare tikneberšengere prandina kori romani populacia”.

I resarin akale tribinakiri sine te ovel vazdime i minsas kori romani populacia baše palpalunipa taro phandipe e tikneberšengere prandinengoro tare 3 aspektoja: jurstikano, medicinakoro thaj socialnikano. Ki tribina lele than 15 prezentetntoja tare biradžikane organizacie, 2 prezententoja tare institucie thaj 24 dizutne taro Delčevo thaj Pehčevo.

Baše juristikane palpalunipa taro phandipe e tikneberšengere prandinengoro vakerda i Mirjanka Trenčevska, pali vokacia advokati. Voj denda vakeripe baši zakoneskiri regulative bašo phandipe e prandinakoro e tikneberšale simenca/lica, e trubutne dokumentoja bašo prandipe, mukhipe e prandinatar thaj alimentacia. Ko agor peskere vakeripastar vakerda kaj e palpalunipa taro mukhipe e prandinatar thaj o bikamipe ani buvli familia majbut cidena e čhave. O D-r Vojčo Atanasov, specijalisto-ginekologo, vakerda baše palpalunipa taro anglederutno khamnipe, e čhania e kontracepciakere kori terni populacia, o džanlipe e PAP-testongoro thaj o psihologikano momento kori e terne daja save si panda čhave. Ano peskoro vakeripe apelirinda ko labaripe e prezervativengoro sar arakhipe taro bimanglo khamnipe thaj o poloskere nakhle nasvalipa. I Desa Hristova taro Centro baše socialnikane butja Delčevo vakerda kaj sa e terne paroja tari romani populacia si labarutne e socialnikane arkakere. O Centro baše socialnikane butja but fare kerela intervencia ane čipote kana e tikne beršengiri sima/lice bizo dendo lafi e daj/dadestar džala te dživdinel pire partneresa, ane but čipote thaj ko pobut čipote isi olen rezultatoja adaleske.

Maškar aver, ki tribina sine diskutirime baše problemoja save so ovena a sip handle e tikneberšengere simenva tari jekh konfesia, sar thaj tari aver. Sine dendi konstatacia kaj isi baro numero e avralprandinengoro familiengoro kori romani populacia, numa thaj kaj isi baro numero e prandipaskere parongoro save so na dživdinena jekhethane, a nane mukhle e prandinatar adaleske so isi olen phari ekonomikani situacia thaj nane olen love te pokinen e ardžipa bašo mukhipe e prandinatar. Thaj adjaar, e participanteja dende pumaro razipe kaj sa pobuter e terne čhajendar save so but angleder o vaxt xulena ano prandipe bašo khamnipe thaj si baro o numero e džuvljengoro save so čhinavena o bimanglo khamnipe.

Tari tribina iklile duj šerutne rekomendacie thaj adava: trubutni si bareder edukacia thaj informiripe baši kontracepcia thaj poloskere nakhle nasvalipa (palo šajdipa te oven organizirime asavke tribune thaj ane ruralnikane maškaripa) thaj trubutno sit e oven kerde pobare kolaboracie e Centrosa baši socialnikani buti thaj e edukaciakere institucie.

I Tribina organizirinda i Fondacia Instituto putardo amalipe- Makedonia ano jekhethano butikeripe e ofisosa e proektoskoro ano Delčevo (Regionalnikano centro bašo autoriziripe Delčevo – anglederutno Centro bašo dendo dumo ko BRO Delčevo).